

Timmisartuni ilaasut amerlanerpaaffissaat pillugit Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allanngortinneqartumi, § 12 a aamma § 29, imm. 2 aamma imm. 3 malillugit aalajangersarneqarpoq:

Sapaatip akunneranut nunatsinnut tikittut amerlanerpaaffissaat

§ 1. Coronamut allattoqarfik Air Greenlandimut aamma timmisartortitsepatigiiffinnut allanut aalajangersimasumik Kalaallit Nunaannukartartunut nalunaaruteqassaaq, Kalaallit Nunaannut tikissinnaasut sapaatip akunneranut amerlanerpaamik qassiunersut.

Timmisartukkut aqquiti aalajangersimasuunngitsut aqquutigalugit nunatsinnut angalanerit

§ 2. Timmisartut allat § 1-imi taaneqanngitsut nunatsinnut angalasunik ilaasoqaqqusaanngillat, taamaattorli imm. 2 takuuk.

Imm. 2. Timmisartuutileqatigiiffit § 1-imi ilanngitsunik aammalu inuiaqatigiinnut pingaarutilimmik siunertaqarlutik nunatsinnukartunik angallasserusukkunik nunatsinnut angalanissamut akuersisummik Corona pillugu allatseqarfimmut qinnuteqarsinnaapput. Timmisartuutileqatigiiffilli tikinnginnermi akuersisummik tigusaqareersimassaaq.

§ 3. Tunumut timmisartortitsineq Namminersorlutik Oqartussanik kiffartuussinissamik isumaqatigiissutinik naammassinninniarluni pisoq ilaasut amerlanerpaaffissaat pillugu nalunaarummi ilaatinneqanngilaq.

Pineqaatissiissuteqartarnej

§ 4. §§ 1-imi imaluunniit 2-mik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Imm. 3. Akiliisitsissutit Nunap Karsianut tutsinneqassapput.

Atuutilersitsineq, atorunnaarsitsineq piffissarlu atuuffissaq

§ 5. Nalunaarut ulloq 1. juli 2021-mi atuutilissaaq.

Imm. 2. Ilutigalugu Timmisartuni ilaasut amerlanerpaaffissaat pillugit Namminersorlutik Oqartussat nalunaarutaat nr. 18 21. maj 2021-meersoq atorunnaarsinneqarpoq.

Imm. 3. Nalunaarut 31. august 2021 ilanngullugu atuutissaaq.

Namminersorlutik Oqartussat, ulloq 30. juni 2021

Kirsten Fencker
Peqqinnissamut Naalakkersuisoq

/ Aka Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut